

Uunga siunnersuut: Greenland Oil Spill Response A/S pillugu Inatsisartut inatsisaata atorunnaarsinneqarnissaa pillugu Inatsisartut inatsisaat
(Aatsitassanut Inatsisillu Atuutsinneqarnerannut Naalakkersuisoq)

Saqqummiussissut

(Aatsitassanut Inatsisillu Atuutsinneqarnerannut Naalakkersuisoq)

Aappassaanneerpeqarnera

Naalakkersuisut sinnerlugit Aningaasaqarnermut Akileraartarnermullu Ataatsimiititaliaq inatsisissatut siunnersuut sukumiisumik suliarimmagu qutsavigaara.

Ataatsimiititaliami amerlanerussuteqartut siunnersuutip akuerineqarnissaa inassutigaa.

Naalakkersuisut maluginiarpaat, Greenland Oil Spill Response A/S pillugu Inatsisartut inatsisaata atorunnaarsinneqarnerani apeqquq taanna inaarutaasumik isummerfigineqarsinnaalerpat, ingerlatseqatigiiffiup ingerlanneqarnerata ingerlaqqinnissaa pillugu ingerlatseqatigiiffimmut Namminersorlutik Oqartussanit pigineqartumut allamut ingerlatseqatigiiffiup pigisai nalillit aningaasartuutissaasalu tunniunneqarnissaat pillugu apeqquummut tunngatillugu, Inatsisartut aammalu Inatsisartuni ataatsimiititaliat attuumassuteqartut ilisimatinneqarnissaat aammalu pisariaqarpat akuutinneqarnissaat, ataatsimiititaliap naatsorsuutigigaa.

Uuliakornernut upalungaarsimanerup siunissami isumaginissaanut tunngatillugu apeqquq taanna pingaaruteqartorujussuusoq Naalakkersuisut isumaqatigaat, aammalu Naalakkersuisut ingerlatseqatigiiffiup pigisaasa nalillit aningaasartuutissaasalu tunniunneqarnissaat pillugu suliap ingerlanerata ingerlaqqinneranut atatillugu, attuumassuteqartuni Inatsisartut aamma ataatsimiititaliat attuumassuteqartut ilisimatissavaat.

Paasissutissiissutigisinnaavara Sikukip pisortaa Greenland Oil Spill Response A/S-imi pisortaagallareermat, aammalu pigisat nalillit aningaasartuutissallu tunniunneqarnissaat naammassiinnagassaassammat.

Ataatsimiititaliami amerlanerussuteqartut siunnersuutip akuerineqarnissaa inassutigimmassuk Naalakkersuisut sinnerlugit nuannaarutigaa.

Naalakkersuisut taamatut oqaaseqarlutik siunnersuut aappassaanneerpeqarnissaanut suliassanngortippaat.